



24.09.24

UKA 2024/7
Pele Broberg, Naleraq

2025-imut aningaasanut inatsisissatut siunnersuut.

(Aningaasaqarnermut Akileraartarnermullu Naalakkersuisoq)

Siullermeerneqarneranut oqaaseqaat:

Uagut Naleqqamiit ukioq manna allatulaaq isigisimavarput 2025-mi aningaasanut inatsisissatut siunnersuut. Tassami ukiuni siuliini qinigaaffik aallartipparput naalakkersuisooqataalluta, taamani neriorsorneqarpugut: ”Allannguutissat suliarilerpagut”.

Kisianni ajoraluartumik taanna isumaqatigiinniarnertit tunngavissaa inissinneqanngitsoortarluni, ullumikkumut inissippoq. Qanoq paasisariaqarpa?

Qinigaaffik aallartikkaanni, ukioq aallarereersoq qaqutikkut iliuuseqarfiginissaa, inissiffigisarnissaa takusarparput. Imatut paasillugu: Piffissaqanngilagunngooq allannguinnissamut, piffissaq imaannaammat.

Kisiannili kaammattuutigisaqattaarnikuugaluarparput maannamullu iluatsissimanngitsoq, tassa aningaasanut inatsisissatut siunnersuut suliarineqartinnagu isumaqatigiinniarnertit ingerlanneqartarnissaat, siullermeerinnineq tikiqqarpagut, sinaakkutit amerlanerussuteqartunik akuersissutigineqarnerat qulakkeerniarlugu.

Isumaqatigilluinnarparpulli una: Ullumikkut aningaasat isumaqatiginninniutaasussat naammangitsut.

Tamanna pinngitsoorneqarsinnaagaluarpoq naalakkersuisooqatigiit amerlanerussuteqartut sinaakkusiisimagaluarpata, siunnersuut suliarineqannginnerani aaliangerlugulu qanoq annertutigisoq illua tungiliuttunut isumaqatigiinniutissatut inississinnaanerlugu.

Ullumikkut naalakkersuisooqatigiit amerlanerussuteqarlualrutik sinneqartoorut iluminni inississinnaavaat. Taava isumaqatigiinniutaava? Tassani isumaqatigilluinnarparput partiit allat uani inersuarmi ullumikkut oqariartuutaat, naamik taava isumaqatigiinniarnertut taaneqarsinnaanngilaq.

Naleqqamiilli taakku taareerlugit nuannaarutigalugu aamma maluginiarparput Naalakkersuisut siulittaasuata aamma assammik isaassinera, taannalu uagut atorluarusupparput.

Arlaqartunik isornartorsiorfissanik ujarlerata, soorunami aamma taassallugit avaqqunneqarsinnaanngitsut naqqittariaqarmata, kisianni pingaarnersiulaarluta ullumikkut isumaqatigiinniarnertit pingaartitagut angumerisinnaasatullu isigisagut 2025-mut aningaasanut inatsisissamut siunnersuummut qaqilertorniarpagut, tassa aallararteriaruma, illuliornermut taavalu aamma sanaartornermut tunngasut, ukiuni siuliini Naleqqamiit siunnersuutaasut uterfiginngikkaluarlugit, amerlanerussutillit maani inersuarmi aalajangereernikuusaat sulii aningaasalersornagu killiffeqarneq ajuusaarutigalugu innersuukkusupparput aamma aningaasanut inatsimmi peqqusinikkut pisinnaammat tunngavissanik peqarnissaat innuttaasut qinnuteqalerunik



Naleraq

toqqavissaminnik sanaartorfissaminnik illoqarfimmiusariaqanngitsoq aamma nunaqarfimmi najugalinnut.

Periarfissat taakku aaqinneqartariaqarput, qulakkeerniarlugu aningaasaliissutit allaffissornikkut aporfilersorneqannginnissaat. Tassami ineqarnermut aaqqissuusseqqinnermut aamma taanna atavoq.

Najukat tamarmik akitsussapput, ilaannai aaqqissorneqassapput, ukiuni qulini tulliuuttuni tassa siunnerfigisaq. Killilersueqalutalu inatsisitigut nunaqarfimmi isorliunerusumi arlaanniluunniit inissaminnik sanaartornialeraangata. Taanna massakut assammik isaassilluta oqariartuutigissavarput amerlanerussuteqartitsinissamut peqataassaagut, iliuuseqarnialerutta.

Tassami Naleqqamiit aamma aaqqiissut maanna taareersinnaagatsigu, akileraartartut isertitakkaat, akunnattumik isertitallit aammalu isertitakinnerit tamavimmik iluaqutissaannik aaqqissuusseqqinneq allatut inisseqqissinnaagatsigu.

Ullumikkut nalunngilarput arlallit najukkaminni pisortat pigisaanni inaataat 6.000-it akornaniittuni, neriorsorneqarsimagaluartut inigisartik pigilissagaat. Suli taanna neriorsuut piviusunngortissinnaavarput.

Ullumikkullu pisortat inaataanni najugaqartut qulakkeerinniffigisinnaavagut, inigisartik pigilerusukkunikku pigisinnaassagaat.

Taamaasilluta pisortat allaffissornerunersuat millisarsinnaavarput, aammalu avaqqunneqarsinnaanngitsoq tassaasoq aaqqissuusseqqinneq innuttaasut kaasarfiiniit aallernani inississinnaaneq.

Suliniulli taanna kisimiissinnaanngilaq, avaqqunneqarsinnaanngilaq nunatsinni aningaasalersuisalernissaq ineqarnermut. Naleqqamiilli aamma peqataassaagut uani aningaasanik inatsimmi isumaqatigiinniutini ilaatinneqarusussappat nunatsinni ineqarnermut aningaasalersuisalernissamut aaqqissuusseqqinnissaq, tassa Danmarkimi "Realkredit"-imik taaneqartartoq.

Ullumikkummi killilersuut tamatta nalunngilarput, illoqarfiit aalajangersimasut kisimik attartuisinnaapput ineqarnerminnut, tassanilu 40%, 20% nammineq akiliutigisussaallugu. Nunatsinnimi attartuisinnaaneq, aningaasat kaaviaartissinnaalernerat ujartorniannigilarput? Naleqqamiit qularutiginngilarput tamanna piumaneqassasoq nunatsinni.

Tassami qiviraanni nunatsinni ukiut 20-t, 30-t massa ilaat ukiut 40-t inuiaqatigiit inissiaataanni najugaqarsimasut qaammatit marluk akiliisimannikkunik anisitaasut.

Taamaammat piumasut pisortat inaataanniittut Inuiaat Kalaallit pigilerniarlissuk, naleqartutut inissisimallutik aamma misiginiassavaat, nalilimmillu pigisaqalerlutik.

Tassani uani aningaasanut inatsisissami siunnersuummi aningaasalersorneqanngitsup annertoorujussuup aaqqiivigineqarsinnaanera qularutiginngilarput.



Tullip tulliatut taasariaqarparput aamma siusinnerusukkut aamma maani amerlanerussuteqarluartut tapersernikuusaat, aningaasalerneqarnissaa aallartinnissaat Naleqqamiit tapersissagatsigu.

Mittarfiit Tasiilami aammalu Ittoqqortoormiuni sananeqarnissaat 2025-mi aallartinniarneqarnissaanut aningaasalersornissaaq tapersissagatsigu.

Isumaqatigiinniarnernut sukkut qanoq aningaasalernissaa qularutigingilarput Naalakkersuisut nalunngereeraat, ataasiaannarata eqqartoreeratsigu.

Mittarfiilli taakku marluk nutaamik pilersitsiffigalugit, Tasiilami 1199 meter-i Ittoqqortoormiuni 1800 meter-i assigiinngitsumik siunertaqarnerat tassani tikinneqarsinnaavoq, siusinnerusukkut Ittoqqortoormiut Mestersvig paarlatsigalugu “dual-use”-imik taaneqartarnera, ujjartorneqarsinnaanera tapersingaaatsiaratsigu.

Tasiilamilu piviusut aallaavigalugit inissisimaffissaa takinerusinnaanngimmat taanna Naleqqamiit malugilluareeratsigu. Taassumap saniatigut aamma maluginiareerparput siusinnerusukkut nalunaarusiarineqareertoq tassaasoq mittarfiit sineriatsinniittut tallilertornissaannut periarfissat tassani aamma ilalernissaat taassagatsigu Naleqqamiit piffissanngortoq.

Siusinnerusukkut 37 million kr.-ilerlugu nalilerneqartoq Aasiaat mittarfia 1199 meter-imut tallilertornissaa suli isumassarsiatsialattut isigaarput, Sisimiuni mittarfik 1199 meter-imut tallippat aamma taamatutaaq.

Ilaat takoreerpagummi aningaasartuutit qanoq annikitsiginersut, mittarfiit 13-iusuni ilamerngi 799 meter-iusut tallilertornissaat 1199 meter-ip tungaanut. Tassami Naleqqamiit avaqqunneqarsinnaanngitsutut isigaarput nunarput tamarmiusoq ataatsimut nalilerlugu ineriartorfissalerlugu ingerlariaqqinnissaaq 2025-mi.

Maannamullu mittarfiit taakkartoreerlugit erseqqissaassutigissavarput Naleqqamiit pilersaarutaanikuusimasut illoqarfimmi sulisut atorlugit ingerlaannaq aallartisartoqarsinnaanera periarfissaanera, taanna kaammattuutigerusupparput.

Mittarfiillu qimallugit tullia alloriarfissaaq Naleqqamiit peqataaffigerusutarput aningaasanut inatsisissat siunnersuummi 2025-mut tassaapput qulimiguulinnut mittarfeeqqat iliuseqarfiginissaat. Tassa takornariaqarneruvoq ineriartulerpoq, ila qanormi angalassagamik ukiakkut avannaani sikusartumi, kujataani sikorsuaqalertartumi?

Naleqqamiit ingerlaannaq unneqqarilluta taassavarput, nalunngilarput maanna pilersaarutaasuni allaqqasoq: Kujataani qulimiguulinnik kiffartuussilluni isumaqatigiissuteqassanngitsoq Qaqortup mittarfia piareerpat.

Naleqqamiilli isumaqatiginngilarput taamatut eqqarsariartaaseqarnek, soq siullertut avaqqunneqarsinnaannginnami annaassiniarneq nunatsinni qulimiguulinnik peqarfiginissaa.

Aalisartoqarfiuvugut avannaaniikkuit, kujataaniikkuit, kitaaniikkuit kangianiikkuilluunniit nunatsinni. Taannalu biilerluni annaassiniarluni atorneqarsinnaanngilaq, qulimiguullit avaqqunneqarsinnaanngillat.



Qulimiguullit tikikkumaarpakka, qulimiguulinnulli mittarfiit aningaasalersugassat qanoq annikitsiginersut nalunngereerlugit erseqqissaassutigissavarput ullumikkut nunaqarfeqarmat qulimiguulinnulluunniit mittarfeqangitsut.

Suli ullumikkumut inuerusaaneq ingerlanneqartoq malugivaat aqutissiuunneqangillat ineriartornermut peqataanissaannut. Naleqqamiillu assammik isaassineq naaperiaaffissanik ujaruineq tigulluarlugu, taakku periarfissatsialattut atorniarpagut aamma qaqilertornissaat, peqangitsut talliliinnaratik peqalersinnissaat.

Qulimiguullit tikikkumavakka aammalu suluusallit. Ullumikkummi naluneqanngilaq Air Greenland, suliffeqarfissuaaterput nunatsinnut tulluanngivissunik timmisartuuteqarluni nunatta iluani kiffartuussiniarsarisoq.

Qulimiguullit siullitissagukkit, ataasiaannarnani taaneqarnikuuvoq piumasaqaatinngooq allangormata taanna ilumuunngilluinnartut naqissusersinnaavarput maani oqaluttarfimmiit Naleqqamiit.

2014-mili pilersaarutaasut nalunnginneqarnikuupput periarfissaareernikuuvoq nalimmassarneqarnissaq nunatsinni ullutsinnut nalimmassarlugu issittumi najugaqarnerput ilutigalugu. Suli taamaasiortoqannginnera tupigusuutigaarput, sualummillu akisussaatisoqannginnera suli tupigusuutiginerullugu.

Avannaani najugaqartuuguit ilami aamma ullumikkut Nuummi najugaqartuuguit, Sisimiuni najugaqartuuguit timmisartukkut tikisitsineq suluusalinnut nunatsinnut qanoq tulluutinnginnerat takoreerparput.

Naleqqamiit maluginiarparput Air Greenland-imiit neqeroorutigigaat nakkutilliinermut Dash 8-t tulluurtunngooq, ila nunatsinnut tulluanngereerput Dash 8-t, taamaammat neqeroorutiginnissaat tulluurtut isigivallaarnatigu.

Kingumut qiviartariaqanngilagut Dash 7 maqaasineru utersaarfigissallugu tassami nutaalianik sanasoaqareerpoq. Assartuisinnaasut nunatsinnut mittarfinnut minnernut aamma tulluarsinnaasut.

Aamma ingerlariaqqissagutta qulimiguullit timmisartullu maanna pigineqartut qiviassagaanni, mittarfeqarfiit aamma avaqqunneqarsinnaanngillat qiviassallugit iliuuseqarfiginnissaat. Taannali immikkoortup tulliani oqallisigilerutsigu annertunerusumik pulaffigissavarput.

Inuiaqatigiit ingerlatsiviit ullumikkut landskarsimut aningaasalersuisarnerat tikilaassagaanni aqqissuusseqqinneq pisariaqarlunartoq avaqqunneqarsinnaanngitsoq Naleqqamiit isigivarput.

Aammalu assammik isaassinikuuneq tigulluarnerani tunngaviuvoq malunnaatilimmik innuttaasunut iliuuseqarsinnaaneq takusinnaagatsigu. Tassami akileraartarnermut aqqissuusseqqinnissaq ullumikkut aamma tunngaviuvoq oqallinnernut, tassanilu siunnersuutaasoq aningaasalersorneqanngitsoq malillugu siunnersuuteqarsinnaagaluaanni aqqiissutaasinnaasumik ajornangitsuaqqamik pisinnaavoq.



Tassami ullumikkut amigartoorneq aallaavigalugu siunnersuuteqartoqarpoq taannalu paarlanneqarsinnaavoq akileraartarnerup tamakkiisumik landskarsimut nakkartalerlutik 25%-imut appartinneranut.

Taamaasilluta inuiaqatigiinni annaasaqarata sulinermut ilanngaasut, inummut ilanngaasut, ila ilanngaaterpassuit allaffissornaqisut piiarsinnaagatsigit sulinerlu imminut akilersinnaanera qulakkeersinnaallutigu.

Piitsooqatigiilluta nunatsinni inuutitsiniaaneq Naleqqamiit isumaqatiginngilarput. Ingerlatitsiviillu sulisutik akileraartarnikkut 25%-imik inissippata nalunngilarput sulerusussinnaaneq annertusarneqassasoq, tassami ullumikkut koruuni siulleq ilanngaasut ilanngutereerlugu immaqa 37 krone-mik tunniussisoqassaaq.

Koruunillu tullia ilanngaasut peereerpat 42%-imik ilanngaaffigineqassaaq. Sooq taava innuttaasut suleqqullugillu kaammattuutit ikkussornianngilagut? Sulisinnaanerannut iluaqutissartalinnik.

Aningaasalersugaareersoq inummut ilanngaasut piiarlugu, sulinermut ilanngaasut piiarlugu Naleqqamiit isumaqatigiinniarnerni peqataatinnikuuarput, kisitsisaatigaagullu ullumikkumut siunnersuutigut oqimaqatigiissumik inississinnaaneri. Naleqqamiilli ammaffigaarput sipaarniarqarusunngippat allaffissornikkut, pisortallu ingerlatsineranni aap taava 30%-iutinniartigu.

Kisianni periarfissatsialak ullumikkut atorussupparput akileraartarneq 25%-imut apparnissaa tungavilersussallugu. Tassami inuuniarneq akitsorsarneqareeqisoq nalunngilarput, innaallagissap akia, erngup akia aammalu imeqarneq, allatigullu sutigit tamatigit akitsorsaanerit innuttaasut aqqusaartuarpata.

Taava sumik sukutsitaa ajorpa? Innuttaasut kaasarfianiit aallerunnaarluta, annikinnerusumik tigooqqaaffigalugit nalimmassarfigigutsigit uagut pisortaninngaanniit.

Soorunami Naleqqamiit qungujulluta tamanna taavarput isumaqatigiinniarnerni maannamut killiffimmuut nalunnginnatsigu allatut ingerlariaqqittoqarusunnikuusoq. Kisiannili assammik isaassineq suli makkua isumaqatiginninniutaasinnaaneri tamavimmik nuannaarutigalugu taamatut Naleqqamiit oqariartuuteqassagut aqqiussusseqqinnissamut.

Ullumikkut avaqqunneqarsinnaanngilaq aamma aningaasaqarnermut inatsisissamut siunnersuummut qiviassagaanni innuttaasunut atugassarititagit qanoq ittuuneri qiviassallugit.

Tassami ”anigaasanik isaatitsivissanik nutaanik pisariaqartitsivugut” oqariartuuteqartoqarpoq. Nutaanilli aqqutissanik pilersitsisinnaaneq suli tikkuussiffigineqarani.

Uagut Naleqqamiit anguniagaraarput nunatsinni tulluusimaarutigalugit aalisartut siunissaannik tunniussinissaq peqataaffigissallugu. Ullumikkutut sukarsuit allat eqqartuinnavillugit kangugalugillu sooq aalisartut inissittarnerat isumaqatiginnginnatsigu.

Aammagooq nunattagooq aningaasaqarnianera ingerlalluarpoq, kisianni ila siammasissumik aningaasaliinerit ingerlanneqarpunngooq, Nuuk Ilulissat Qaqortorlu taaneqartarlutik. Naleqqamiit



isiginnittariaaserput allaanerularpoq, nunatta aningaasaqarnera ingerlalluarpat, ilungersortut arlaqarsinnaagaluartullu taallugit, taava qanoq paasisariaqarpa nunatsinni ingerlalluarneq?

Aatsaat ingerlalluarpa inuit akiliisinnaaneri artorsartinniarsarigaanni? Aatsaat ingerlalluurtarpa najugaqarnerani akitsorserfigineqaraangata? Imaluunniit inuiaqatigiinni ingerlalluassava pisortaniit ulluinnarsiutaat aporfilersorunnaarlugit oqilisaaffigigutsigit?

Ila siusinnerusukkut oqaluttuarisaaneq qiviaraanni, Kalaallit akissaajaatitut Folketing-imiit isigineqarlutik naartunaveersaatilik ikkusuiffigineqarnikuupput. Ullumikkullu meeqqanut aningaasartuutikillisaanissaq isertuunneqassanngilarooq, oqariartuutaalluni.

Sooruna Kalaallit pineqalertullu sipaarniarneq pilersartooq? Ila allamiullu pineqaleraangata sipaartariaqarata. Sukarsuinngoriaasaartarlutik allamiut pineqaleraangata aningaasalersornissaat.

Taavalu ingerlalluagigutta oqariartuut ukiuni tulliuttuni pisortat aningaasaqarnerat ajalusoorsinnaavoq, taallugu.

Ila oqariartuutigineqartut ullumikkut arlaqaqisut Naleqqamiit maluginiarpagut allaat ernumasaarinermik imaqarsinnaasutut nalilersinnaasunik. Soormiuna taama ajornartigitikkippit Kalaallit Nunaanni inuuniarneq? Kalaaliuguit, danskiuguit allamiuugalaruilluunniit.

Ila ujartugassarigaluarparput innuttaasut ulluinnarsiutaat qanoq oqilisaavigisinnaanerlugit, artukkerniarsarinagit.

Aningaasaliissuterpasut maannamut eqqartorneqarnikuupput maannamulli eqqartorneqanngillat qanoq ilinnut, uannut, tamatsinnut iluaqutaasussaaneeri siunissaq isigalugu. Illoqarfiit ataasiakkaat eqqartorneqarput qanoq siunissamut iluaquserneqarsinnaanerat. Sineriammiut akilersugassaat.

Naleqqamiit tamakku soorunami eqqummaariffigalugit anersaaq suleqatigiinnissamut piusoq atorlugu isumaqatigiinniarnernut qaaqusaassagutta, siunnerfigisagut timitalersornissaat pillugit peqataassaagut.

Naleqqamiillu aamma ersarissorujussuarmik taassavarput, siusinnerusukkut periarfissaq atorneqarnikuusoq aningaasanut inatsisissamut 2025-mut atorneqarnissaa kaammattuutigerusukkatsigu, tassa pinngitsaaliissummik katersisussaataitanerup atorunnaarallarsinneqarnissaa.

Qinigaaffiup tulliata taava takutissavaa suli pinngitsaaliissummik katersisussaataitarusunnertut, taamaasillutillu akissarsiaminnik 10%-ia, ineqarnermut 67%-ia, kallerup inneranut 7%-ia, akissaqartinneraat akileraartartut.

Neriorsuutit tusaareerpagut, boligsikring-igooq qaffassaaq, kiap akiligassaa? Ila ullumikkumut aningaasanut inatsisissamut siunnersuut 2025-imoortoq eqqarsartitsilaarami, kaasarfimmiit kaasarfimmut nuussuineruinnaanngitsoq kaasarfilli putoorarlugit, suli kaasarfimmiit kaasarfimmut suli nuussiniarsarisooqarpoq.



Aningaasat nunatsinni kaaviaartinneqarnissaat, iluaqutaanissaat, innuttaasunut amerlanerpaanut ujjartorneqartariaqartoq Naleqqamiit oqariartuutigissavarput.

Maannalu siusinnerusukkut taalaarsimasara, sulinermut tunngasoq, aalisarnermut tunngasoq aammalu akileraartarnermut tunngasoq tigussaanerulaartumik oqaasertalissavara.

Sulisinnaasunngooq sulissapput, akerlianilli tunitsivinni nunaqarfinni isorliunerusuni ullormut tunisisinnaanerit killilersorneqarluni. Qanoq ataqtigiippa?

Aalisagaq nioqqutissaavoq nunanut allanut annissuunneqartartoq, nalilimmik nunatsinnut pilersitsisartoq, akerlianik suliffissuit anginerit nunatsinniittut ilaat aalisartoqarfimmiuunngitsaq allaffissualiulerput. Sooq aalisartoqarfissuarmiikkusunngillat?

Allaffissorneq qanga nunatsinnut oorinik isaatitsigami? Qanga akissaajaataajunnaarami allaffissorneq? Ila sulisinnaasut sulissapput oqariartuutigalugulu, akerlianilli fabrik-iliorniarlutik qinnuteqarunik nunaminertaminnik ukiut arlallit uninngatinneqartarlutik. Naak inatsisunik eqaallisaanerit? Naak nunatsinnut qulakkeerinninniarsarineq? Illoqarfiit, nunaqarfiit ineriartorusuttut isaatitsinissaannut pilersitsineq.

Ila aningaasartuutit pisortaniit imaannaanngeqisut saqqummiussuunneqarput, nuannaartugalugit uninngasuutitunngooq, Inuiaat Kalaallit uninngasuutaannik tigusillutik atuiniarmata.

Ileqqaarinninneq ataasinnguamilluunniit taaneqanngilaq aningaasanut inatsisissamut siunnersuummut 2025-mut.

Ajunngilagunngooq, ajalusoorsinnaavugunngooq. Sulilu ileqqaarinnittoqarani. Ila eqqarsarnaq, ukiut tamaasa qinersisassagaluaratta, aningaasanut inatsit neriorsuutininik ulikkaangaartarmat.

Ullumikkut eqqartugarput aningaasanut inatsisissamut siunnersuut 2025-moortoq periarfissiivoq Naalackersuisut siulittaasuata oqariartuutaani atorlugu, aaqqiissutissat isumaqatigiinniutaaniarlik, kiap pilersissimanagera pingaartinnerunagu, naalackersuisooqatigiinneerpat illua-tungiliuttuuneerpalluunniit. Nunap inui pingaarnertut inissillugit, qaa, peqataassaagut Naleqqamiit.

Naggasiinitsinni uteqqissavarput maannamut akitsuutit aningaasartuutissat qaffakkiartuinnavissut, akerlianillu akissarsiat malinnaatinnagit inissikkiartorneq avaqqussinnaannginnatsigu nassuerutigiginissaa allatut aaqqiisariaqartugut. Qinigaaffimmut tullianut utaqqisariaqassagutta Naleqqamiit aamma soorunami piareerfigissavarput ajuusaarutigissavarpullu.

Taamaammatt tamakkiisumik assammik isaassineq aaqqissuusseqqivinnissanut peqataasinnaalluta oqaatigeqqissavarput, naak siusinnerusukkut tamanna kissaatigineqarsimanngikkaluortoq. Tamattali kukkusinnaatitaavugut, kukkunerullu nassuerutiginera annernartutut isiginngilarput, nuannaarnartutut isigaarput. Neriuppugullu isumaqatiginninniarnernut ullumikkut taakkartukkagut ilaatillugit qaaqqunekarumaartugut, qilanaaralugulu.

Taamatut oqaasertalerlugu aningaasaqarniarnermut ataatsimiitsitaliamut ingerlateqqinniarparput, nalunaguli ukiuni siuliini suleriuseq maanna allanngartariaqartoq, tassa aningaasaqarnermut



Naleraq

ataatsimiitsitaliami suliarineqarsinnaanngimmat isumaqatigiinniarneq partiit Naalackersuisullu akornanniippoq taanna.

Isumaqatigiissutaasullu malinneqartalernissaat neriuutigalugu Naleqqamiit qilanaarivarput ingerlariaqqinnissaq.